



CENTRALE BANK VAN ARUBA

Reservanan internacional ta keda na un nivel adecua

Comunicado di prensa

Durante e reunion di 14 di december 2020 y despues di a revisa e dato economico y monetario mas recien, e Comité di Maneho Monetario (CMM)¹ di Banco Central di Aruba (BCA) a dicidi pa mantene e porcentahe actual di e tasa di e “reserve requirement” (reserva rekeri) na 7,0 porciento. E tasa di e reserva rekeri ta e cantidad minimo di reserva cu banconan comercial mester mantene na BCA y ta igual na 7,0 porciento di nan obligacionnan cu ta vence den menos di 2 aña. A considera e siguiente informacion y analisis pa yega na e decision aki.

Reservanan internacional

E reservanan internacional (incluyendo e diferencia di revaluacion di oro y reserva di divisa) a aumenta cu Afl. 467,9 miyon te cu y incluyendo 27 di november 2020, compara cu fin di december 2019. E aumento aki tabata debi na un bahada den importacion causa pa menos demanda di turismo y local, fianza di gobierno ricibi for di exterior, medidanan di divisa tuma door di BCA y revaluacion di e reserva di oro di BCA causa pa subida den prijs di oro riba mercado internacional. Reservanan oficial di divisa a nota un subida di Afl. 502,3 miyon. Consecuentemente, e reservanan oficial y e reservanan internacional a crece te na, respectivamente, Afl. 2.267,0 miyon y Afl. 2.367,4 miyon riba e fecha di november 27 2020. Di e manera aki e nivel di reservanan a keda adecua ora di compara nan cu e nivel critico di 3 luna di pago pa importacion registra ariba cuenta corriente y e metrico di ARA², di IMF (Grafico 1). Na final di november 2020 e reservanan internacional tabata cubri 10,0 luna di pago pa importacion registra ariba cuenta corriente, mientras cu e nivel di reservanan oficial a yega 106,6 porciento di e metrico di ARA.

¹ E CMM a ser institui na mei 2010 pa periodicamente evalua y determina e maneho monetario di BCA. Adicionalmente, CMM ta aspira pa mehora e transparencia di maneho monetario.

² E metrico di IMF ARA ta referi na “Assessing Reserve Adequacy Metric” di Fondo Monetario Internacional cual ta midi con adecua e reservanan oficial ta door di compara esaki cu un averahe a base di peso di placa den circulacion, fianza entre companianan liga na otro, debe riba termino cortico y termino largo, y exportacion di bienes y servicio.




Grafico 1 - Reservanan

Desaroyonan den credito

Den october 2020, credito total a baha cu Afl. 10,5 miyon of 0,3 por ciento, compara cu fin di 2019. Esaki tabata relaciona principalmente cu e componente “otro”, cu a nota un caida di Afl. 56,0 miyon (-9,8 por ciento), door cu bono di gobierno manteni den portfolio di banconan comercial a vence. Contrariamente, e componente “fiansa na individuonan” a contribui positivamente na e credito total (+Afl. 29,8 miyon/+1,6 por ciento), principalmente door di fianza pa hipoteca di cas. E componente “fiansa na empresa” a subi cu Afl. 15,7 million (+1,0 por ciento), cu ta e resultado di un demanda mas halto pa credito cu un termino di mas di dos aña.

Inflacion

Inflacion, basa riba CPI, tabata 2,8 por ciento mas abou na october 2020 compara cu e mesun luna di e aña anterior (Grafico 2). Esaki tabata primordialmente causa pa prijs mas abou di gasoline y un reduccion den tarifa di corriente. E promedio di inflacion di 12 luna a baha te na -0,2 por ciento na october 2020, compara cu e nivel halto di 4,3 por ciento registra na juni 2019. E expectativa ta cu e promedio di inflacion di 12 luna lo sigui baha den e resto di aña debi na un reduccion den tarifa di corriente desde 1 di januari 2020, asumiendo un prijs mas abou y stabil di crudo, como tambe ningun aumento di impuesto. E promedio di inflacion di 12 luna, excluyendo e componentenan di energia y cuminda, tabata 0,7 por ciento na october 2020.




Grafico 2 - Inflacion

Likides prudencial

E likides prudencial di banconan comercial (32,0 por ciento), cual ta midi e cantidad di activo likido compara cu e activo total netto di e banconan comercial, a keda na un nivel adecua den september 2020. Esaki ta mas halto cu e likides minimo rekeri di 15,0 por ciento.

Banco Central di Aruba

3 di februari 2020